

卷十七

山川志

同州府志

同州府志卷十七

山川志

華爲豫鎮梁亦晉望陽紆浚門大河斯抗清淑磅礴
疆域鞏壯原本禹貢以辨方向述山川志第六

府境之山南華北梁鄭康成注禹貢所謂陰列次陰列也
華山大幹自終南來終南一名秦嶺于藍田縣南分兩支
一支東南行爲熊耳山一支正東行爲太華山由渭南縣
東南境入同州府華州之西南境去州治五十里者曰箭
谷嶺山海經之竹山也大赤水出焉

山海經英山西五十二里曰竹山其上多喬木其陰多
鐵有草焉其名曰黃藿其狀如樗其葉如麻白華而赤
實其狀如赭浴之已疥又可已肘竹水出焉北流注于
渭郝氏山在今陝西渭南縣東南四十里俗名大秦嶺
亦曰箭谷嶺蓋因多竹箭得名

通志箭谷卽竹山在華州西南五十里

寰宇記山在鄭縣西南高一千二百六丈

華州志箭峪在龍耳山西爲竹木繁植之區峪下爲華
州原峪西爲渭南界卽古竹山

按禹貢導山皆自西而東如曰西傾朱圉鳥鼠至于太華順山勢之大幹而敘之也山海經則自東而西逆而數之西山經首錢來次松果次太華次少華以至西海蓋以帝都蒲坂由中山經而外敘之也然究以禹貢爲正茲之所錄山名皆主于山海經而敘次則用禹貢之法

箭峪之東去州治四十里者曰澗谷山海經之英山也階峪之水出焉北流于大赤水

山海經石脆山西七十里曰英山其上多扭樞其陰多

鐵其陽多赤金禹水出焉北流注于招水

寰宇記英山在鄭縣西南一百三十里有孤栢原水經云孤栢原禹水出焉

華州志澗谷在州西南四十里龍耳山北

澗峪之東北在州治西南三十里者曰赤谷山海經之石脆山也小赤水出焉

山海經石脆之山其木多欒栲其草多條其狀如韭而白華黑實食之已疥其陽多璚琤之玉其陰多銅灌水出焉而北流注于禹水

寰宇記灌水一名小赤水今名高谷水山海經云出石
脆山

赤谷之東在州治西南三十里者曰喬峪山海經之符禺
山也喬峪之水出焉

山海經符禺之山其陽多銅其陰多鐵其上有木焉名
曰文莖其實如棗可以已聾其草多條其狀如葵而赤
華黃實如嬰兒舌食之使人不惑符禺之水出焉而北
流注于渭

寰宇記符禺山在鄭縣西南一百里高一百丈

華州志喬峪在州西南三十里瓜坡西其麓有白龍泉
黑龍泉又下曰千頃漫迤北有原曰龍王嘴有白泉在
龍王廟中噴玉濺珠澄清見底

喬峪之東在州治南十里者曰少華山

山海經少華之山其木多荆杞其獸多牝牛其陰多磬
石其陰多瑇瑁之玉鳥多赤鷩可以禦火其草有萆荔
狀如烏韭而生于石上亦緣木而生食之已心痛

少華山盤亘可三百里南抵秦嶺東連太華北散爲州境
諸原秦嶺以南之水皆南流入丹以北之水皆北流入澗

其主峰曰少華又名獨秀峰又名玉女峰其支峰隨地異

名曰白石峪小敷水出焉曰潭峪白龍潭水出焉曰水峪

曰鄭南峰西溪水出焉曰太平峪南溪水出焉曰飛來峰

曰醮紙峪曰石隄谷曰栲栳山曰五龍山曰馬嶺山曰赤

隄峪

入峪有胡蘆潭南二十五里卽秦嶺

曰聖山曰金堆原曰龍耳山皆少

華之支分于西南者也曰小敷峪敷水出焉曰鳳居山曰

金壺峪曰倉坪曰阜頭峰曰蟠龍山其迤北曰獼虎峪曰

柿峪曰白崖峪移山潭之水出焉曰構嶺

入谷三十里至秦嶺石橋

水出焉曰鳳谷山曰三甲山曰方山方山河之水出焉皆

少華之支分于東北者也

華州志少華山中峰卽名少華峰又爲獨秀峰或曰玉女峰東爲小敷峪元祐中少華小敷峪內山摧頗傷民社蓋入峪三里爲車轍崖又二十里有玉女廟廟之東有金壺峽其神異古今莫能採取之又十里爲蒼坪又十里曰千崖嶺東有仙人洞洞乃張三丰與華陽真人等所居者洞下有小泉足汲以爲數人之用東爲寧山山下建浮屠以圖鎮山蓋宋時小敷峪內山摧爲警也又東爲獼虎峪南入十五里爲蟠龍寺或云潛龍山兩

山環列甲于諸山迤北近峪口之峰古云阜頭峰

宋神宗封

阜頭峯神爲顯應侯

天禧五年崩裂有石子坡

今日石灘

東西五里南

北十里史稱民居六社壓伏無存鄰山之民言數年峯

上有雲氣遇風雨卽隱隱有聲是夜初昏略無風雨山

上忽霧起有聲漸大地遂震山裂其下水出其深無際

名曰移山潭其崩山遺址名半截山又曰復成山其潭

水又匯爲數區今日蓮花池自石子坡仰視復成山址

若未崩之狀其間靈灝鍾異草木奮興又石阜上有孫

碧雲道庵庵下山谿中有巨石大窩世傳孫碧雲受張

三丰仙人道術馭鶴引風明太祖御賜衲衣膳果成祖
召爲右正一提點武當山二勅又有御製詩賜虛元子
孫碧雲有詞又代遣使召問賜號虛元子以歸東爲白
崖峪峪路亦通蟠龍山寺又東爲構峪南二十里至乾
喜鋪又二十里至構嶺又二十五里曰下陽川民聚數
百家立爐燒銀銅錫砂石自下陽川又南一十五里至
秦嶺土人云秦嶺左右峪中多錫砂又南四十里至白
樺嶺卽土人名金堆城者其地礦穴百出
銀砂稱盛或淘取黃金之砂金堆城西南則青岡坪出銅砂又其南則通道于商洛襄鄧之墟自構峪
口東爲鳳谷山山接秦嶺南來之脈突立一峯左右兩

山若舒翼然其山栢樹翳鬱遠眊于數十里之外山故
有寺寺有石泉養魚嘉靖乙卯地震水泉涸廢東爲三
甲山又東爲方山接華陰境矣自少華峰之西曰白石
峪又西爲潭峪卽白龍潭也又西爲水峪峪之麓有甘
露寺西爲鄭南峯

以後周所移鄭縣名

又西爲太平峪有五眼泉

一名海眼泉引細流入于華州城內花果蔬木之需華
州官署四宅之圃咸冬夏用之而不更注城外卽有餘
入于泮池泉之側稱洞巖土人塑仙人韓子像數禱雨
有驗又西爲飛來峯又西爲小山又西爲五龍山山巖

有風穴風來能殺穀稼土人祀壓之又建元帝廟洎風
伯雨師祠以鎮又西爲石隄峪峪水流至良侯村之北
名五港河合赤隄峪水入沙澗石橋鋪河以達于渭其
來甚遠南入峪裏曰五里泉文豹石又五里曰東歧溝
又五里曰楊家龕又五里曰灰池又六里爲千崖二岔
又二里爲東石門西石門又五里爲棗天石又十里曰
董家坪瓦房底秦嶺底度秦嶺十里曰吳宮饒材木凡
華之民多就取之又五里曰黑龍潭峽又五里合青岡
坪坪之東南十五里抵金堆城自青岡坪正南十里爲

羽坪又十里爲五勝溝接洛南境自石是峪峪之西爲
栲栲山又西爲赤是峪入峪卽有葫蘆潭峪之南二十
五里餘至秦嶺嶺南曰桃坪雍人曰自此山勢西南行數百里之外又到終南屏
障以應曲江之漚而爲長安大都云自赤隄峪之西南爲小師原又南爲

短嶺卽有溝水以達遇仙橋水自小師原迤西稱柳村

原其下之最北曰瓜坡滎以衆泉古瓜田之地也自瓜

坡而西南升原曰平原又升之南曰奈莊又南之山曰

金堆峪金堆峪以達秦嶺之金堆城者瓜坡之下西北

曰車獨村麓間有寺松栢翦鬱眺遊者欣賞焉自車獨

村而降也爲漁村川沿川之徑陟東麓曰上清宮宮在
山之內上有林阜稱勝臨一泉在宮之側甘可給數百
人之用乃宮中道士聚百人云上清宮之南有古元真
觀其東南之原稱張海北村而上清宮之南沿川者又
有雲溪宮南爲興國寺又南爲王聖村其西南稍稍見
秦嶺一脈而左稱三岔坪右稱插劍石下曰喬峪喬峪
水卽下帶諸漫水流爲漁村川而入于遇仙橋者也喬
峪之麓有白龍泉黑龍泉又下曰千頃漫又下迤北有
原稱龍王嘴西爲駱駝渠粵龍王嘴之次曰秦麓村村

間有白泉在龍王廟中今泉水噴

珠勢若龍湧且

澄清見底人樂眺遊云又北曰大明亦原之勝地也

其原之下曰會東方村中大夫東方朔墓在其地會

東方村之西曰赤水鎮赤水遵川而南曰聖山川又西

南曰新興頭又南迤東曰高堂嶺有高堂村村之下有

朱張村又有靈湫湫有龍王廟高堂村之上有高堂寺

又以南曰柿村又南之山曰李峪峪口曰蘊空寺寺

峪之西曰澗峪峪南有向陽宮飲馬槽亦華之形勝也

澗峪之北曰豐山寺又北爲明初孫主政別墅又北爲

江村原原有川水秀若江南蜀之李貳侯某曰華州西南原諸勝地當以江村爲第一蓋愛其爲佳山水也江村之北曰大王村其次有邱有岳廟澗峪之西曰牛耳峪其下爲邊家村郭家村其次稱禮似村村有唐寺焉牛耳峪之西曰龍耳山西爲箭峪蓋竹木繁植之區其下迤北有邱有禪修寺有蘭若寺有泉是謂華州原地在在皆有民居凡余寺觀之紀皆因村落民廬而及也箭峪之西爲獨孤之坡則渭南縣界矣

同州府舊志五龍山在州南十里山巖有風穴風出傷